

91: 303
42
+
SOCIETY OF LONDON

SCRUTINIUM PESTIS

AL QHOD
Præside D. I. O. M.

Ex DECRETO & AUTHORITY
AMPLISSIMÆ ac GRATIOSISSIMÆ
FACULTATIS MEDICÆ
IN ILLUSTR
WILHELMIANA ACADEMIA

PRO
Summis in *Medicina* Honoribus,
privilegiis ac insignibus DOCTORALIBUS
ritè consequendis

DISPUTATIONE INAUGURALI

Publico & Solenni Magnifici & Amplissimi
SENATUS ACADEMICI

Examini subijciet

JOH. RODOLPHUS
NEUHUUSIUS, H. Bernensis.

Die 22. Februarii, L. H. C.

MARBURGI CATTORUM, *duplicate*

Typis JOHANNIS JODOCI KÜRSNERI, Academiae Typogr.
ANNO MDCLXXXIII.

BRITISH MUSEUM
SALE DUPLICATE
I 7 8 7



A JEHOVA sit initium.

I.



Uâ truculentiâ pestis plurimas Germaniæ regiones peragrande depopuletur, quot urbes incolis horrenda strage exhauriat, & qualem omnibus circumjacentibus hucusq; ab ista perniosa lue liberis metum atque horrorem incutiat, palam est: Omnes enim ad ejus mentionem pavescimus, nullus est quem formido non occupet, cùm mors ipsa malorum appareat minimum iis quos ipsa invadit. Itaque in tempore de debellando ac à mœniis arcendo astutissimo atque simul fortissimo hoc hoste consilia ineundum censui. Quibus itaque armis, quo valore, quibus confœderatis & stratagematibus humano generi insidietur illudque oppugnet breviter inquiremus, ut eò melioribus ac maximè proportionatis armis instructi, ipsi resistere eumq; invadentem jugulare possimus.

II.

Pestis ergo, quam describere animus, est morbus Epidemicus contagiosus consistens in summa sanguinis turbatione per materiam aliquam subtilem malignam inducta, cum apparentia ex anthematum, anthracum, bubonum aliorumque symptomatum horrendo apparatu.

III.

UNde autem fit & quomodo generetur materia illa maligna primò inquirendum, ad quod pauca quædam ex phycis petenda. Notum est pro variatione figuræ particularum terrestrium earumque compositione & conjunctione varia fieri interjacentia spatiola, quæ à materia tantum subtilissima occupari possunt; Quæ materia quia indefinitæ est figuræ in illis spatiolis concrefcere & in parvas abire massulas facillimum est; quæ massulæ pro varia figura & magnitudine spatiolorum istorum variè etiam modificantur, qualem etiam concretionem nobis descriplit *Des Cartes* in explicatione Phœnomenôn magneticorum, quam vocat materiam striatam. *Part. III. Princ. §. 88.* Sed prout illa materia striata nascitur in spatiolis inter globulos cœlestes triangularibus: Ita hæc nostra in spatiolis particularum terrestrium; de qua vide eundem Authorem *Part. IV. Princ. §. 185.*

IV.

Quia autem unumquodque corpus sibi particularem habet talem materiam magis vel minus cum poris aliorum corporum convenientem, variæ antipathiæ & sympathiæ oriuntur; Illa autem cum qua nobis negotium, ita modificata est, ut minimè cum porulis & textura nostri sanguinis conveniat, sed illum, si ipsi immisceatur omnimodè turbet & molleculas ejus planè destruat, unde maligna vocatur. Et pro majori gradu inconvenientiæ major & major etiam est gradus malignitatis.

V.

Non putem autem illas massulas nudas & sine vehiculo, è telluris gremio vel undecunque tandem sint, nobis afflari, nec diu ita solas persistere posse, sed iisdem particulis talia spatiola intra se continentibus, quasi in sinu gestantur & hinc inde deferuntur; quæ si sanguini nostro, sive jam fiat per respirationem sive contactum sive alimenta &c. communicentur, à calore vitali ex eorum ergastulis excutiuntur; Et quia velocissimè moventur, facilè sanguinis compagem & mixturam omnimodè turbant non aliter ac fit in vino vel cerevesia fulmine tacta; Quia autem hæ particulæ terrestres tales massulas in se continentes uniusmodi & æquali copia non semper adsunt, neque ab astris materia subtilissima eadem co-

pia

pia nec ejusdem generis ad nostram terram defertur, etiam hæc lues pestilentialis miris variatur modis nec iisdem semper remediis arceri vel excuti potest.

VI.

Insuper notandum est sanguinem ex certis quibusdam guttulis sive molleculis componi, quæ quamdiu integræ & legitimo modo dispositæ manent sanguis turbatus dici non potest, quanquam interim valdè impurus esse possit. Exemplo res fiet clarior; Si acervus frumenti ex puris & pulcherrimis granis sit congestus, purus erit; at si alia immisceantur, ut lapides, ligna &c. impurum quidem dicetur frumentum, nullo modo autem turbatum vel destructum; sed quando jam impurum est & singula grana comminuuntur, tunc demum destruetur & turbari dicetur. Idem accidit in sanguine, quanquam variæ particulæ heterogeneæ sanguini immisceantur, nondum tamen turbatur vel destruitur ejus mixtura, etsi cacochymia oriatur; sed quando molleculæ ejus destruuntur, statim turbatur & corrumpitur, & secundum varios gradus hujusurbationis variæ fiunt febres, inter quas ultimum gradum obtinet pestilentialis vel pestis.

VII.

His jam positis facilè omnia phænomena, quæ circa pestem observantur explicari poterunt. Contagium epidemicum & multiplicationem ejus quod attinet, obscura esse non possunt, modo attendamus ad continuam insensibilem corporum nostrorum transpirationem, aëremque nobis circumjacentem talibus scatere posse particulis, quæ talem in sinu gerunt materiam subtilem humano generi exitialem; Et quamdiu illa spatiola in illis corpusculis integra manent, continuo novas in illis concrefcere massulas tales delererias; imò illa materia subtilis in corporibus infectorum sibi secundum figuram suam excavare & post se relinquere poros, in quibus postea aliæ concrefcant sibi similes, & ita brevi tempore valdè augeatur veneni copia & multiplicetur.

VIII.

Quod autem plures in eodem aëre his particulis imprægnato degentes, imò frequentius circa ægrotos versantes & absque præservatione hæc lue non inficiantur id diversæ eorum sanguinis

humorumque circulantium dispositioni respectu veneni adscribendum puto ; quod videmus in melancholicis , qui non tam facile in peste inficiuntur ut alii ; Hinc facile etiam ratio reddi potest , quomodo accidere possit , quod certæ tantum familiæ hæc affligi , reliquis intactis observentur ; quod illud venenum nunc magis adultis quam infantibus & contra , nunc magis sexui masculino quàm fœminino & contra &c. infensum & exitiale sit.

IX.

EX sanguine ita turbato nullos vel paucissimos posse generari spiritus facile cuivis attendenti patet ; eodem modo ut videmus fieri cum vino vel cerevisia fulmine tacta , ubi ne guttulam quidem spirituosæ liquoris elicere possumus. Hinc tam magnâ statim virium prostratio , appetitus imminutio (quanquam & alia etiam subsit causa) anxietates cordis & lypothymia frequentes ; continuo enim multi deperduntur animales spiritus per insensibilem transpirationem , unde restauratione semper opus est , quæ tamen hic non subsequitur.

X.

ET quia sanguinis legitima textura destructa est , particulae æquales æqualibus , secundum naturæ leges magis associantur , v. gr. salinae salinis , sulphureæ sulphureis &c. & omnes sui juris fiunt quia vincula disrupta sunt : Ita ut diversæ illæ materiae non tam sit pestis causæ quam producta morbosa , quod semel annotasse sufficiet ; Perseverante autem adhuc sanguinis circulatione , nunc ejus pars salina & magis rarefscens , nunc pituitosa vel terrestris ipsum cor ingreditur , & pro diversa illa dispositione nunc citius nunc tardius rarefit , unde pulsus , nunc celer nunc tardus , nunc magnus , nunc parvus , nunc fortis nunc debilis , imò aliquando intermittens est vel planè cessat , quanquam imminutio spirituum animalium multum etiam ad languorem & debilitatem faciat. Si autem ab acredine salium jam sui juris factorum cor lancinetur , statim , quia musculus est , convellitur & ad violentum motum à spiritibus animalibus cum impetu influentibus cogitur : accedente interim etiam propter consensum spasmodica contractione arteriarum præcipuè circa cordis basin ubi à pluribus nervulis complecti in anatomia observantur. Hinc sanguis , cum vio-

lencia

lencia ex corde expressus non inveniens commodam viam per arterias transeundi, repercutitur quasi & in latera vim suam exerit & ita palpitaciones cordis excitat, *de qua re vide Willisium.*

XI.

Necessariò etiam hinc inde variæ in diversis partibus resultant obstructions, unde tot postea oriuntur symptomata. Nam pro ratione diversitatis materiæ obstruentis & diversitate partium earumq; dispositione symptoma aliud & aliud erit: quæ diversitas in eadem peste ab alio non dependet quam à diversissima constitutione tum humorum tum texturæ partium solidarum variorum hominum. In uno enim subjecto, cujus sanguis multis jam scater particulis salinis, vel etiam sulphureis alia eaq; graviora apparebunt symptomata, quam in alio cujus sanguis antea legitimè temperatus fuit, alia item in alio cujus sanguis pluribus particulis viscosis, crassis, aquosis vel terrestribus infarctum est, minima etiam occasio, quæ facilè hic determinari nequit, efficere potest, ut talis vel talis materia in hanc vel illam potius partem secessum faciat.

XII.

Si fortè particulæ salinæ acres in capite deponantur ibique fibrillas nervosas vel membranas vellicant sive lædunt ejusdem dolorem ingentem pungitivum sive mordacem producant & non permittentes ut pori cerebri blandè subsideant vel claudantur vigilias continuas inducunt, è contra si crassiores pituitosæ & viscidiores ibidem potius segregentur, quæ poros cerebri obliunt & principia nervorum aliquomodo obstruunt, ut spiritus animales, qui jam tum in minori adsunt copia, in nervos influere eosque sufficienter inflare non possint, soporosi isti in peste sæpiùs observabiles affectus oriuntur, si v. gr. in specie meatus nervi auditorii obdurantur, ut in peste Wienensi sæpe observatum est, ægrotantes auditu privantur. Quando autem salia illa in meningibus poros ita obstruunt, ut inflammationes causentur, deliria phrenetica exsurgent.

XIII.

Quando illa salina congeries ad stomachum etiam vergat, statim liquor ille gastricus seu fermentum stomachale vitiatum & appetitus imminuitur & prostratur, acidum enim ab illâ, quia

quia alkalina potius est naturæ maximè infringitur; unde concoctio in ventriculo non ampliùs legitimè procedit & alimenta non in chylum laudabilem sed in foetidam putrilagine abeunt, quæ ad vermes excludendos aptissima, gaudent enim valdè calore tali putredinali; mirum itaq; non est in peste Wienensi integra agmina vermium in principio morbi prodiisse, ut notat *D. Sorbait*, ut plurimùm enim tempore pestem antecedente plurima & variorum generum insecta præsertim muscarum multo maiore turba, quam aliàs consuetum est observantur, quæ suis ovis & aërem & cibos conspurcare solent, quæ ova in corpus nostrum admissa aliquamdiù ibi latere & tandem aliquando accedente putredine sive calore putredinali excludi possunt. Hac de re videatur *Cl. Rhedi*.

XIV.

SAlia illa acredine sua stomachum vellicantia nauseam cum vel sine vomitu producere possunt; sæpè acrimoniam suam in superiore ventriculi orificio, quæ pars acutissimi est sensus, exercent & cardialgiam vel anxietates excitant; aliquando ita caustica sunt, ut ipsas stomachi tunicas corrodant imò nonnunquam sphacelentur, quod etiam de aliis visceribus est intelligendum, si eò potius propter laxitatem vel obstructionem aut aliam dispositionem præeuntem deponantur.

XV.

SI ad intestina pertingant, sive jam hoc fiat mediante bile vel succo pancreatico, vel immediatè ex ventriculo aut glandulis intestinalibus perinde est, saltem fibras intestinorum nerveas vellicabunt & ad excretionem continuo stimulando diarrhæas, vel vasa corrodendo dysenterias & alios excitabunt motus convulsivos, & ut alibi sæpe etiam gangrænam aut sphacelum inducent.

XVI.

QUod si caustica illa salia in vasis capillaribus partium carnosarum & membranacearum subsistunt ibique obstructiones generant, inflammationes & carbunculos producant, non minùs in partibus internis quam externis; Maculæ autem & petechiæ generantur quando hinc inde corrosis vel obstructis & deinde laceratis vasis capillaribus subcutaneis, sanguis extravasatur, in parva ta-

men quantitate nulla subsequente inflammatione, si particulis subtilioribus in auras avolantibus terrestriores tantum relinquuntur, quarum ratione varias inducuntur colores; quando autem iterum disparent materiam illam introcedere & partes nobiliores adoriri judicandum est.

XVII.

AT non tantum sanguis turbatur, sed & reliqui humores circulantur vitiantur, ut lymphæ, ita ut in glandulis quoque præcipue conglobatis; quia poros arctiores minusque rectos obtinent substantiamque molliorem habent, obstructions oboriuntur, ubi si lymphæ stagnet & colligatur glandulas nunc plures nunc pauciores in tumores attollat, quo ipso vasa sanguifera circumjacentia comprimuntur sanguisque ibi stagnare cogitur, unde bubones suas ducunt natales, qui quidem tam formidabiles, ut anthraces, non sunt modo rite tractentur. Observatum enim est plurimam partem eorum quibus bubones erupuerunt in ultima Wiennensium peste evasisse, præcipue si in partibus nobilioribus suam non fixerunt sedem.

XVIII.

Lymphæ hæc vitata nonnunquam vasa salivalia obstruit, unde sitis inextinguibilis, oris siccitas & ardor necessario consequi debet; Saliva enim ab æstu interno eò delata à particulis aquosis sufficienter dilui non possunt; sero interim ad alias partes tendente ubi liberior ipsi conceditur via, sæpe enim ad intestina copiosius ruit & tunc diarrhæis materiam præbet, nunc in renibus copiosius percolatur & urinæ profluvium causatur: quod in peste Wiennensi sæpius factum, ut à prædicto Wiennensi Medico annotatum est. Nec multum facescit negotii explicatio inconstantiæ & variæ urinæ mutationis; Quia omnes humores corporis in conveniente sua dispositione sunt turbati, quis mirabitur, si renes aliquando magis aliquando minus obstruantur, si eorum fermentum vitietur, & cum massa sanguinis non sit ubique sibi æqualis; urinæ nunc de hac nunc de illa plus minus participet materia, nunc tenuis & cruda, sæpius tincta valde, nunc crassa & turbida, imò pessima segregetur, nunc nigricans oleaginosa aut livida corruptionis lethalis certum indicans excernatur. Alia adhuc multa in peste observantur

phœnomena, quæ tamen æquè facilè per posita illa principia dilucidari posse confido.

XIX.

His jam prædictis, quo pacto rationalis præservatiō & curatio superstruenda sit porro videndum; Quia materia illa subtilis pestilentialis vires suas exerit sanguinis compagem solvendo texturamque omnimodè turbando, omnia ea ad præservationem necessariò observanda esse censeo, quæ sanguinis mixtionem sarram rectam servare possunt. Quo facit Diæta, quæ si legitima instituatur multum auget optimeque conservat corporis robur. Consistit autem in conveniente regimine sex rerum non naturalium. Ex quibus præcipuè hic considerandæ sunt, aër & animi pathemata de cæteris mediocritas recommendatur.

XX.

Quia continuò tali tempore aërem jam infectum & talibus particulis imprægnatum attrahere cogimur, nil consultius esse patet, quam citò se in alias sanioris conferre aëris regiones juxta tritum illud

Mox, longè, tardè, cede, recede redi;

Cùm autem non cuivis officium hoc permittat, nec sine conscientia læsione id semper fieri possit, aër quantum potest corrigendus, depurandus & ab istis particulis lethalibus liberandus, quod optimè fit igne luculento ex lignis resinosis & arridis, juniperinis, quercinis, abietinis, &c. accenso, & fumigiis variis, quæ ex sulphure, myrrha, pulvere pyreo, baccis juniperi tabaco &c. fieri debent; quo pertinet Eolipila, quam recommendat *Excellentissimus atq; Experientissimus Archiater Hassiacus, hujus Universitatis Medic. Professor Primarius, Dn. D. Waldschmidt*. Item campanarum sonitus & bombardarum frequentiores explosiones. Modus autem quo hæc & similia operentur ex seq. thesi 27. facilè concludi poterit; Interim aër privatus circa domicilia & inhabitationibus infectorum cautè fugiendus, si verò quis ex officio ægrotis adesse cogatur monitum *Celeberrimi Dobrizenski Professoris Pragensis* diligenter observet, salivamque nunquam deglutiat, sed exspuat, quod etiam intelligendum de iis rebus, quæ ad præservationem

in ore masticantur quæ nunquam deglutienda, facile enim aër infectus, se salivæ in ore commiscet, unde observatur venenum vires suas in ventriculo præcipuè exferere, prout prædictus Author in suo tractatu de hac re annotat. Nunquam etiam jejuno ventriculo is tempore pestis egredi debet qui suæ studet sanitati, fermentum enim ventriculi tunc temporis sopitum quasi jacet & aciditate sua, ut aliàs fit venenum destruere & mutare non potest.

XXI.

Quamvis ad animi pathemata, tranquilla debent esse omnia, præcipuè contra metum, terrorem & pavorem firmandus est animus, qui si erectus sit & imperterritus medicinæ loco est, melancholicæ imaginationes musica vel poculo hilaritatis abigendæ; Experientia enim testatur pusillarimes & meticulosos citius peste corripì, quam qui cordatè Dei voluntati sese subjiciunt, fiduciam suam primò in Deum, postea in medicum ejusque præscripta medicamenta firmiter ponunt & interdum ad recreationem corporis & animi hilarem transigunt horulam.

XXII.

Corpus etiam ab omnibus impuritatibus liberandum, liberumque servandum; vitiosi humores, si copiosius adfuerint, in tempore lenitivo aliquo medicamento ex primis viis & corpore deturbandi; non autem quævis vetula vel agyrta à consiliis sit, quamquam facile, vel stercore passerulorum, muscerdâ vel antimonio aut Euphorbio alvum citare possint; sed prudens hac in re medicus est consulendus; nec generalis hac in re regula præscribi potest, quia mutatis circumstantiis ipsa etiam medicamenta mutanda, purgantia autem fortiora planè exulent, movendo enim & agitando humores, texturamque sanguinis laxando veneno januam magis apperiant. Sufficere itaque possunt pilulæ aloëticæ, vel pestilenciales Ruffii vel vinum aloëticum &c. ut alvus semper sui memor retineatur.

XXIII.

Vomitória nunquam sine prudentis medici consilio tali tempore in usum vocanda, quando autem tempestivè & justâ dosi, ad vomitum propensis & facilibus, iisque quibus stomachus multa materia pituitosa & viscida infarctus, exhibentur; multum

commodi afferre & sæpè periculofissimos morbos avertere vel in primis incunabulis jugulare possunt; Et vix tutiora dantur q̃o Emetico Mynsichiti. Vitriolo albo, vel aliquo alio emetico diaphoretico ex antimonio.

XXIV.

VEnæ sectio planè proscribenda nisi in valdè assuetis maximeque plethoricis, de qua vide inferius.

XXV.

Reliquarum etiam purgationum corporis per hæmorrhoides, menstrua &c. fluxus, quibusdam consuetus omninò procurandus, ne retentis iis, sanguinis legitima dispositio mutetur.

XXVI.

Quoniam venenum ut plurimum se primo lymphæ insinuat, ibiq; etià diu latere potest; In præservatione maxima laus fontanellis debetur, præsertim in hodierna peste, ut experientia testatur: Notat enim Medicus quidam Wienensis per tales fonticulos in peste affectis statim maximam nigrantis ac fœtidæ materiæ copiam affluxisse; Et plurimam partem eorum, qui talibus instructi erant, evasisse, imò prædictus Author sui & amicorum suorum conservationem maximam partem adscribit, non quidem fonticulis, sed aliquali eorum succedaneo, dum scribit se in utroque inguine incisione facta emissarium parasse, quæ cutis crassitiem paulò excederet, transversi digiti tantum longitudine illi postmodum turundam indidisse, ne vulnus coalesceret; & eò pactò perpetuo feri effluxui occasionem præbuisse, cujus exitum in illo ut & cæteris uberiolem semper fuisse, quo tempore major infectorum numerus occurreret; Hocque auxilium adeò proficuum fuisse, ut ne unus quidem eorum peste correptus fuerit: Itaque & præcipuè cavendum eo tempore à fonticulorum occlusionem; quæ etiam de aliorum ulcerum rheumaticorum, maximè in femoribus & partibus inferioribus curatione intelligendum; ut plurimum enim illos qui talibus & similibus ulceribus affligebantur in aliis pestis temporibus evasisse testantur multi Celeberrimi Authores. Alia est ratio cum fœdis illis ulceribus à lue venerea prognatis, quibus cum pestis se aliquando faciliùs conjungit.

XXVII.

Quia autem neque hæc sufficienter nos præservare possunt, ad specifica confugiendum; Talia autem duplicis generis constitui possunt: scilicet quæ tales continent particulas, quæ poros materiæ hoc venenum generantis faciliè ingredi, mutare ac diffringere valent; Si enim huic materiæ pori ad motum & figuram suam accommodati non ampliùs supersunt, faciliè destruetur & dissipabitur, quia multo majori copia talis materia reperitur, ubi liberius movetur & poros ad suam figuram efformatos offendit, ut videre est in magnete, circa quem & in quo semper major invenitur copia materiæ striatæ quam alibi, quia poros habet motui & figuræ suæ valdè accommodatos; Si autem pori ejus mutantur sponte illa materia striata recedit & vis ejus perit. Secundò, quæ tales in se habent poros & meatus in quos materia illa subtilis pestilentialis faciliè intrare non item egredi potest, sed ibidem vel mutari vel cum particulis istis inviscantibus præcipitari debet. His addi possunt, quæ sanguinem leniter agitant motumque particularum minimarum in sanguine ita augent, ut qua data porta per corporis poros eliminantur sanguinique optima textura conservetur. Et his venenum sive sit in- sive extra corpus tolli posse nullus dubito. Sunt autem vel interna vel externa.

XXVIII.

EX internis in prima acie stant acida blanda, acutis enim & scindentibus suis particulis faciliè se in tales poros ingerere spatiolaq; talia mutare possunt, quanquam & alio etiam profint respectu, quatenus scilicet sanguinis compagem arctiorem reddunt, ut postea resolutioni non tam obnoxius sit; Quatenus item fermentum ventriculi roborant, acidum enim blandum naturæ ejus valde amicum. Et in his maximam poni posse confidentiam, ratio, ut dixi suadet, & experientia testatur. Vinum autem quia tale blandum & naturæ nostræ amicum subtile continet acidum vix ulli cedit alii. Hoc solo se præservavit *Sayerus Medicus ille Anglicus*. Etiam *Excellentissimus atque Experientissimus Dñ. D. Woldschmidt* / Præceptor meus nunquam non venerandus in peste Hanoviensi haustulo vini generosi recens ex cella allati atque ante visitationem agrorum assumpti sanum & incolumem se servavit. Cui compositum magis placet

præsto habeat vinum citratum, camphoratum, ennulatum vel infusum absynthii, carduibened. rad. angelicæ, zedoariæ. Tale acidum blandum & amicum etiam possident poma citrea, & aurea, hinc in hodierna peste tanto cum successu usurpantur, & omnia quæ ex iis fiunt, ut morsuli, ex succo & corticibus citri, syrupus ex toto citro &c.

XXIX.

His succedit vini acetum, tum simplex; quia se præservavit Clarissimus *Sylvius*, ut ipse testatur. *Ego sanè, inquit, ante novennium cum quotidie plures visitare agros peste infectos præcautionis loco aliud non sumpsi medicamentum quam vulgaris aceti. vini cochleare unum mica panis exceptum & quidem manè antequam inviserem agros; id remediî genus usurpavi per octo menses, continuos, nec unquam minimam percepi toto illo tempore ab infectione noxam.* Tum compositum cujus variæ hinc inde prostant descriptiones & nomina: Celebre est illud *Uratravienſium Phyſicorum in Conſilio Medico de peste* descriptum vel illud *Theriacle Timarà Guldenkle*, cui addi possunt extract. rad. carlinæ, cardibened. centaur. minor. flor. stœchados &c. Vel simplicius multò fieri potest si recipiantur Rutæ recent. miiij. scord mij. conscisis affundantur ✚ vini optici ℥ij addantur duo vel plura poma citria in frusta dissecta; & erit optimum medicamentum, quo se cum multis centenis hominibus præservavit in *Polonia Celebris quidam Medicus* in diversis pestis temporibus. Ex his & similibus acetis sæpe cochleare unum vel alterum de die assumere convenit. Verum quidem est non omnibus in horum usu licere perseverare, propter singularem aliquam dispositionem melancholicam dictam, & tunc ab his vel abstinendum aut aquis quibusdam destillatis simplicibus aut compositis diluenda, ut ▽ rosarum, lavend. rutæ, cinamom. buglossata vel borraginata &c. Spiritus autem acidi, ut salis aut nitri cum spiritu vini cohobando dulcificandi. Commodum etiam talia aceta aliis multis medicamentis præbere possunt vehiculum, tum ut junctis viribus agant, tum, ut sæpius opus est, nimium eorum calorem temperent prout in Theriaca, mitridatio &c.

Cum igitur præ cæteris omnibus ad prophylaxin tempore pestis acida conducant, si accommodato cujusvis naturæ modo assumantur, in varia forma exhiberi possunt; si alicui placeant conservæ, prostant plurimæ, ut rosarum vitriolat. violarum, florum calend. anthos. borag. &c. quibus addendus spiritus aliquis acidus ad gratam aciditatem, ut spiritus salis, nitri, vel sulphuris aut acetum destillatum; Et stomacho jejuno quantitate nucis juglandis assumenda. Ex Syrupis exhiberi possunt, ille ex succo berberum, citri, arantiorum, ribesiorum, granatorum, acetosæ &c. sed melius videtur, si illi succi ^{sive} saccharo ex jusculo aut vino assumantur; Ex talibus succis etiam tabellæ parantur. Magni hic æstimanda est aqua alexiphar. Amstelodamensium & egregia illa aqua Prophylactica *Sylvii, von der Schagen & Barbette*; quam describit *Sylvius Prax. Med. lib. 1. cap. 28. §. 31.* Hic etiam minimè spernendus usus tum Fri crudi tum cremoris vel Tartari vitriolati: Etiam à pluribus varii commendantur spiritus ardentes, aquæ vitæ & Theriacales, quibus tamen non admodum fidendum puto, adde quod ut plurimum in nimia assumantur quantitate, unde fermentum ventriculi obruitur & enervatur, ita ut blanda sua aciditate veneno amplius resistere non possit; senibus tamen & iis qui frigidioris sunt temperamenti magis prodesse possunt.

XXXI.

Quæ materiam illam pestilentialem in suis poris inviscant, mutant, præcipitant, vel per sudorem aut diaphoresin ex corpore propellunt, varia etiam sunt, & in variis formis reperiuntur, quia autem major eorum est usus in curatione inferius recensentur. Saltem hic notandū, quòd fumus nicotianæ per fistulam attractus huc pertineat, quo se præservavit *Clar. Diemerbroeck.* in peste Neomagensi.

XXXII.

Externè ad odorem maximè commendantur poma citria & aurea recentia &c. Balsama varia hinc inde ab Authoribus descripta. Cum successu conficiuntur pixidulæ sive noduli ex ligno juniperino vel alio perforati, quibus spongia aceto rutacco vel alio bezoartico aut theriacali aut balsamo rutæ præservativo aut oleo pestilentiali

stidentiali *Heinissii* intincta inditur; Nimum autem suaveolentibus & pomis ambrae, graveolentibus it em non multum fidendum, in medio tutius itur.

XXXIII.

A Muleta planè rejicienda non videntur, præcipuè illud *Helmon-*
tii ex bufonibus; cujus & similia vis in eo consistere videtur;
quod habeant poros ita formatos, ut particulæ veneni faciliè & liberè
se in iis movere possint, unde corpus nostrum deferentes eò se confe-
runt, quicquid enim movetur eò tendit ubi minimam invenit resi-
stentiam. Aliter tamen planè & tutius agunt quæ ex variis alexiphar-
macis componuntur, quale egregium habet *Timæus à Guldenkleæ*.
Imaginationi etiam hic multum tribuendum esse libenter con-
cedo; augetur enim confidentia.

XXXIV.

Nunc de curatione etiam pauca addenda. Cum acutissimus
sit morbus, qui 24. horis sæpissimè jugulet, valde maturanda
curatio: Ergo quando quis tempore pestis ex improviso, cum hor-
rore & calore per vices mutabili, dolore capitis vel dorsi, nausæ vel
vomitu, anxietatibus & subita prostratione virium animi deliquiis
vel aliis supra dictis accidentibus decumbat, non semper anthraces
expectandi sunt aut bubones vel maculae, nec de urina multum
consultandum, aut videndum quo vergat morbus, sed statim post
Deum prudens consulendus Medicus, vel ubi talis haberi non po-
test, ipse sibi consulat æger medicamentis præcipuè alexipharmacis
infra & in variis de peste consiliis descriptis; cum non tam de hoste
arcendo quam expellendo agatur.

XXXV.

Medicus autem statim ab initio vocatus, si ventriculum impu-
ritatibus repletum, ægrum nauseabundum & ad vomitum
facilem inveniat, emeticum aliquod tutum & non nimis violentum,
quod citò suam exerat energiam & intra bihorium vel trihorium
omnem absolvat operationem; exhibere potest; sive sit ex vitriolo
albo, quod in peste Londinensi sæpe proficuum fuisse observatum
est, aut infuso croci metallorum, quo sæpius utebatur *Seyerus*, sive
alio aliquo antimoniali, quod sursum tantum operatur. Sæpe enim
emetico tempestivè adhibito non tantum multa symptomata impe-
diri,

diri, sed etiam ipse morbus aliquando felicissimè averti potest; cuius operatione absolutâ, sine mora ad alexipharmaca prope-
randum. Abstinentum tamen ab emeticis, si vomitus jam sympto-
maticè adsit & nonnisi inanis vomendi conatus observetur,
omniaque assumpta statim rejiciantur, tunc enim vel ab an-
thraxe vel acrimonia salium ventriculi orificium vellicantium pro-
venit, quod prius observavit in famulo suo medicus quidam in
peste Dresdeni, cujus cadaver se aperuisse testatur.

XXXVI.

A reliquis purgantibus præsertim fortioribus absolutè cavendū
in curatione, non tantum enim impediunt diaphoresin ne-
cessariam, sed venenum, quod in exterioribus adhuc hæret parti-
bus commovent & cum sanguine commiscent, sæpiusque diar-
rhæas colliquativas hic valde periculosas excitant: Si verò non re-
spondeat alvus, suppositoriis, vel leni aliquo clystere, blandè ci-
enda: in Declinatione verò morbi lene aliquod purgans vel laxati-
vum exhibere convenit ad præcavendas recidivas.

XXXVII.

Non minùs periculi plena adeoque planè omittenda est venæ-
sectio, totus enim sanguis, cum in sua mixtione turbatus, to-
tus etiam evacuandus esset. Deinde eo ipso venenum, quod extra
sanguinem adhuc hospitatur per venas ad cor derivatur: Hinc non
mirum si experientia testetur omnes illos vel plurimam partem pe-
riisse, quibus venæsectio celebrata fuit: ut annotavit *Paræus* in
Peste per totam Galliam grassante, *Diemerbroeck* in peste Navio-
mageni: *Hodges* in Londinensi, *Guil. Fabritius* in Laufannenfi,
Anthonijs Saracenus in Genevensi & nuper *D. Sorbait* in Wie-
nensi. Dari tamen posse casum quo non tantum admitti debet sed
etiam necessaria, est non nego. Scarificationes & hirudines quia ejus-
dem sunt generis nihil ferè commodi afferre possunt, quanquam
tantundem periculi ac venæsectio non importent. Quia tamen ina-
niter cruciantur & torquentur ægri consultius est abstinere, ut & à
cucurbitulis sine scarificatione, nam affluxui materiæ locum dant.

XXXVIII.

Aliter autem de vesicatoriis judicandum censeo, effectus enim
non exigui in peste comperti sunt, multum enim materiæ
C
aëris

acris ex corpore educunt & ab interioribus partibus derivant, dum exeundi commodiorem ipsi præparant & aperiunt viam, & in nucha, brachiis, femoribus, suris, præcipuè autem parum sub bubonibus applicari possunt, & optimè ex cantharidibus parantur, cavendum tamen ne talibus applicentur, quibus circa vesicam & urinam non integra res est, neque iis, qui hæmorrhagiis subjecti, neq; prægnantibus aut nimium debilibus; sæpiùs etiam sunt renovanda & emplastro de melilotho vel alio in sperso pulvere de cantharitis recentia servanda; ab inflammatione autem foliis brassicæ præservanda.

XXXIX.

EXpertissima autem & securissima omnium sunt alexipharmaca & sudorifera, quæ totû hoc arduum negotium absolvunt & ad quætanquam ad sacram anchoram recurrendum, quamprimùm unum vel alterum apparet signum; venenî enim jam in corpore admissi vix alius enervandi aut expellendi superest modus; Exhibenda ergo sunt quàmprimùm possibile, aut si vomitorium præmittitur, si non cum eo quod valdè conveniens, tamen statim absoluta ejus operatione & quidem in majore dosi quàm aliàs; Et quia semper virium maxima est habenda ratio semper à cardiacis confortativis concomitentur. Cordialia autem imprimis acida sunt eligenda propter rationes supra dictas. Celeberrimus *D. Margraffius Leidenfis Practicus* se plurimas in peste Leidensi ab hac lue liberâsse ipse mihi testatus est, & quidem seq. modo. ℞. vini Rhenani pintam unam Theriæ veteris ad minimum 7. annorum ℥j. ① card. bened. ℥ij. m. stent per noctem, & æger in lecto ad sudorem compositus sumat coch. iij. & sudat, post horas duas iterum iij. cochlear. & ita assumptionem & sudorem continuet per diem integrum. Inter sudorifera sæpiùs experta maximè præminent. Theriac. Androm. cœlestis, mitridatium, Diascordium, Orvietanum, anthithodus Mathioli, Elect: prophylacticon Timæi, Elect. de ovo & similia. Pulveres item Bezoardici varii. Elixiria, Extracta, Essentiæ, Tincturæ legitimis menstruis paratæ; Inter magis simplicia commendantur à primariis, terræ pingues, aut sigillatæ, bolus armena, terra lemnia, turcica, filesiaca, &c. Ex vegetabilibus Rad. contrajerv. angel. petasitidis, dictamni, pimpinellæ &c. herb. Card. bened. Scordii, scabiosæ, rutæ absynthii &c. bacca juniperi, sambuci

sambuci Ebuli & ex his paratum rob. &c. Lignum juniperinum quercinum &c. aloës, myrrha. Ex animalibus Lapis Bezoar, qui tamen famam non semper sustinet, qui ut plurimum supposititius est, C. C. unicornu. Troch. viperarum &c. Ex mineralibus ☿ diaphoret. Bezoarticum minerale &c. ut taceam de aliis plurimis de quibus ipsi Authores videri possunt. Saltem notandum volo faraginem medicamentorum non minùs quam ipsam pestem fugiendam esse, quanquam interim non uni soli medicamento adhaerendum, sed & forma & materia mutanda sæpiùs, ne natura tandem illis assuescat, & pharmacum medicamento naturam exuat. Consuetudo enim minùs movent.

XL.

Cordialia autem confortativa, quæ his adjungi possunt & debent sunt Confect. alkermes, de Hyacyntho, Aq. Cord. Saxon. frig. & temperata; aq. contra febr. malig. C. C. citrata, cinamomi buglossata, cydoniata, Essentia citri saccharata. Syrupus de acetositate citri, succus citri recens expr. vel rubi idæi, perlæ præparatæ, Nitrum perlatum. Spiritus Sulphuris; pulvis cordialis prætiosus &c. ex quibus variæ concinnari possunt formulæ.

XLI.

Quanquam maxima pars symptomatum morbo ritè curato tandem spontè desinant, tamen paucula tantùm brevissimè addere libet de urgentioribus, quæ nonnunquam ipso morbo molestiora & periculosiora videntur. In Dolore Capitis & Delirio Epithema ex aq. Betonicæ aut rosarum, cum aceto sambucino aut calendulæ & opio paratum sæpiusque renovatum tepidè fronti ac temporibus applicatum conducet; aut columbæ & gallinæ vivæ dissectæ capiti capillis liberato imponuntur. Alii plantis pedum in forma cataplasmatibus ex fermento, ruta, sale, sapone veneto, vel raphano cum sale & aceto rutaceo mixto applicant. Hic valdè etiam laudantur vesicatoria in nucha præcipuè applicata. Vigiliæ statim ab initio non sunt arcendæ, quia magis ad necessariam diaphoresin faciunt, tandem tamen externè dissectis columbis & gallinis pedibus applicatis demulcendæ, Ubi si opus sit opiata ritè parata in parva dosi cum appropriatis præcipuè volatilibus juncta, magnum præstant commodum. Soporos autem periculosi valdè sunt,

unde omni conatu ægri à somno arcendi allocutionibus vel acidis acribus volatilibus naribus oblatis aut aliis mediis. Si confortantibus & cordiacis opus sit, præter supra dicta, confectio cordialis Rodolph. II. Imperatoris à D. Sorbait descripta cum vino Malvatico vel supra dictis aquis sæpiùs assumi potest.

XLII.

Sitis & ariditas linguæ, quæ magis molesta quàm periculosa, spiritibus acidis, ut salis, nitri, sulphuris, vitrioli &c. potui ordinario inditis, nitro item antimoniato, lapide prunellæ vel aliis succis acidis assumptis diminui potest. Nausea & vomitus si ab anthrace vel inflammatione tali ventriculi orti, omnia ferè in cassum adhibentur; aliàs vel acidis, sed paulò magis austeris aut quandoque opiatis Theriaca Diascord. compescuntur. Diarrhææ & Dysenteria, quæ peticulosissimæ & plerumque lethales sunt sudoriferis adstringentibus prospiciendum, ut bolo orient. præpar. terra sigillata, tinctura terræ Catechu. &c. Hæmorrhagiæ quanquam aliquando criticæ existant, nunquam tamen securi esse debemus & semper ne invalescant vigilandum citissimè enim quandoque interficiunt.

XLIII.

Communissima symptomata sunt maculæ, bubones & anthraces; Maculæ superato veneno pestilentiali non magnam requirunt curam. Bubones verò à chyrurgis attendendi, & variæ dantur species, nec omnes ad maturitatem deduci possunt; qui mobiles sunt faciliùs quidem discutiuntur, sed tutiùs videtur illos cucurbitulis seu ventosis fixos reddere & ad suppurationem deducere. Curantur autem ut reliqui glandularum tumores additis tamen semper antipestilentialibus, ut theriaca, mitridatio, cæpis alio &c. Instar omnium esse potest vel emplastrum *D. Hodges*, vel magneticum vel maturativum *Uratislaviensium Physicorum*. quæ in consilio medico descripta sunt. Quam primum autem paululum mollescit tumor, non enim semper ruptio spontanea expectanda, phlebotomo aperiendus & mundificandus balsamo sulphuris therebinthinato, vel anisato unà cum unguento basiliconis & Theriaca, non autem consolidandus, quod tamen tandem fieri potest vel prædicto balsamo & superimposito emplastro diapom-

pompholygos, aut solum prælaudatis emplastris. Carbunculi, qui multo periculosiores sunt bubonibus curantur primo impediendo ne ulterius serpent, quo d'optimè fit butyro antimonii, si linea circa carbunculum ducatur, quo ipso etiam fit separatio Escharæ & partium corruptarum, quæ pro secundo necessaria est. Alii ad ferrum & ignem confugiunt, quod non improbandum si modo peritus adlit chyrurgus. Mundificantur postea supra dictis, & tandem ut reliqua ulcera consolidantur. Pauca hæc nunc sufficiant, plura desideranti Authores citati forsan satisfacere possunt.

Interim DEO sit Laus & Gloria in æternum.

NOBILISSIME DOMINE CANDIDATE

Eò deventum est, ut ægris vivendum moriendumve sit, prout Medicus suis speculationibus, quibus in scholis cerebrum fatigavit, vel conjectando scopum attingit, vel ab eodem aberrat. Durum profectò mortalibus fatum! Si tamen cordatè eloqui liceat, causa est, quod pauci sint, qui mentem seriò applicent ad id, quod de facto agit natura, in quo totius rei cardo vertitur. Plurima enim in scholis addiscimus, quæ cum ipsa natura nihil quicquam commune habent, resq; aliter concipiuntur, quàm quales existunt. Neq; à scopo aberravero, si dixerim medendi methodum adeo tortuosam & quandoque fallacem esse culpâ ipsius Philosophiæ, in qua sæpissimè plus valet authoritas quam ratio, quo præjudicio imbuti, si ipsam postea ingrediamur artem medicam, mille statim ipso in introitu offendimus obstacula, quæ impediunt, quò minus in subtilioribus praxeos minutiis indagandis solertiã impendere possimus. Multum itaq; præstitit Philosophorum Phosphorus *Renatus des Cartes*, dum semitam novam ad Fortunatas insulas ceu alter Columbus detexit, cùm enim ejus philosophandi ratio ex immutabilibus & necessariis naturæ legibus petita sit, non potest non ipsa ars medica ex

his fontibus suam haurire certitudinem, quâ hætenus non sine Medicorum turpitudine caruit. Tu Doctissime DN. *CANDIDATE* jactis hac in Philosophia solidioribus fundamentis, in foro medico firmo stas talo, & tam in Gallia & Belgio quam hac in Academia profundioris acquisivisti eruditionem, ut Facultas nostra medica Tibi jam dudum honores Doctorales decreverit; Ego ex animo gratulor & in Praxi felicitatem perennem & virtutibus tuis dignam à DEO Opt. Max. apprecor, qui semper permanens sum

Dabam Mar-

Tibi addictissimus

burgi d. XV.
Febr. 1683.

JOH. JACOB Baldschmied / Archiater
Hassiacus & Professor Medicinæ Primarius.

NOBILISSIMO ac CLARISSIMO

NEUHUSIO, artis Pæoniæ Candidato meriti-
tissimo, experienciâ Chymicâ, Botanicâ, Anatomicâ præ
multis maximè conspicuo, nunc cum laude pro summis
in Arte disputanti præmiis

EUGE BONUM FACTUM!

acclamo

JOH. DANIEL DORSTENIUS, Medicinæ Doctor,
Professor & p. t. Decanus.

EX quo Te Batavis digressum nuper Athenis
Pergamus Hassorum tenuit, perfecit Apollo
Hanc tua NEUHUSI cincturam tempora *Daphnen*;
Quam simul atque lubet, partum virtute brabeum,
Reddere discupio. Faxit Deus, hæc bene cœpta
Ut bene succedant, reducis quoque *myrtea ferta*
Ut Bernæ doctam frontemque comamque coronent.
Optime NEUHUSI meritò Tibi grator utrumque.
Sis memor usque tui *DORSTENII*, & auctus honore
Annos Nestoreos vivas! applaudite Musæ.

EN quod rogabas, Nobilissime ô Neuhaus,
 Carmen, tuis chartis nimis quidem indignum,
 Futurum amoris attamen mei signum:
 Minus pudicos Numinisq, Risores,
 Bardos, inertes, nesciosq, Naturæ,
 Illos scholasticæ superbiæ mystas,
 Cunctosq, queis studium Mathematicum sordet,
 Fastidit usque respuitque Parnassus.
 Verum Tuarum, jure quas Tibi grator,
 Sunt conscii plerique nempe virtutum,
 Lasciviam odisti, Dei times Numen,
 Testantur id Batavi, Alobroges, Franci;
 Nos Te probum vitâ, elegansq, laudamus
 Rarissimæ Eruditionis exemplum;
 Ego cirrulos Tuos & Algebram novi,
 Certissimam basin scientiæ humanæ;
 Senemq, Coum, Pergamique Doctorem
 Cuncti hîc vident ita cognitos Tuis Musis
 Ut in triumphum pestilentiam ducas
 Reliquosque morbos, ceu salutis Assertor.

Paucis istis meritissimis Nobilissimi DN. Candidati,
 Amici mei candidi, honoribus litare, meique memo-
 riam commendare pro lubum fuit


JOH. GEORGIO BRAND, Theol. D.
 & Math. Professori Ord.



Nititur & sudat miles furibundus in armis,
 Et tandem victor præmia justa capit.
 Nititur & sevas jactatur nauta per undas,
 Et tandem portum fessâ carina subit.
 Nititur & sudat, dum glebas frangit arator,
 Denique sudores messis opima levat.
 Niteris & sudas Neuhusi, præmia tandem
 Illa dabunt docti pectoris ausa tui.
 Exopto, Deus ut posthac tua cæpta secundet,
 Ac Tibi succedant prospera quæque. Vale.

Ita Nobilissimo Domino Candidato, Amico & Con-
 victori suo suavissimo, rudi quidem Minervâ, sed
 animitus gratulatur

JOH. JACOB. FRAYSS, Heidelbergâ Palatinus.



Sic tua fata jubent, surgas Doctissime Neuhaus
 Pectus comam, digitumque para, frontemque serena:
 Mox erit, ut stabili letus decoreris honore,
 Quali vix fulgent diademata splendida Regum.
 Artis Apollinea Tibi quando dabuntur honores,
 Hoc meritò grator leto tibi corde βραβεῖον!

Ità l. m. q. gratulabatur

CAROLUS PHILIPPUS LOMBARDIUS.

F I N I S.